

আমরা কীভাবে কুরআন বুঝব?

ড. মোহাম্মদ মানজুরে ইলাহী
সহযোগী অধ্যাপক, জাতীয় বিশ্ববিদ্যালয়

সম্পাদনা

প্রফেসর ড. আবু বকর মুহাম্মদ যাকারিয়া
আল-ফিকহ এণ্ড লিগ্যাল স্টাডিজ বিভাগ
ইসলামী বিশ্ববিদ্যালয়, কুষ্টিয়া

বানান ও ভাষারীতি পরিমার্জন:

মাও. মিজানুর রহমান ফকির

প্রকাশনায়

কাশফুল প্রকাশনী

ভূমিকা

আল-কুরআনুল কারীম মহানবী সাল্লাল্লাহু ‘আলাইহি ওয়াসাল্লামের ওপর আল্লাহ সুবহানাছ ওয়া তা‘আলার পক্ষ থেকে নাযিলকৃত সর্বশ্রেষ্ঠ ও চিরন্তন মু‘জিযা, বিশ্ব মানবতার মুক্তিসনদ। এতে রয়েছে মানব জীবনের সকল দিক ও বিভাগ সম্পর্কে সুস্পষ্ট হিদায়াত ও দিক-নির্দেশনা, রয়েছে আলোকবর্তিকা, উপদেশ, রহমত ও অন্তরের যাবতীয় ব্যাধির উপশম।

আল্লাহ সুবহানাছ ওয়া তা‘আলা বলেন,

يَا أَيُّهَا النَّاسُ قَدْ جَاءَتْكُمْ مَوْعِظَةٌ مِّن رَّبِّكُمْ وَشِفَاءٌ لِّبَنِي فِي
الصُّدُورِ وَهُدًى وَرَحْمَةٌ لِّلْمُؤْمِنِينَ. قُلْ بِفَضْلِ اللَّهِ وَبِرَحْمَتِهِ فَبِذَلِكَ
فَلْيَفْرَحُوا هُوَ خَيْرٌ مِّمَّا يَجْعُونَ.

“হে লোক সকল! তোমাদের প্রতি তোমাদের রবের কাছ থেকে এসেছে উপদেশ ও অন্তরসমূহে যা আছে তার আরোগ্য এবং মুমিনদের জন্য হিদায়াত ও রহমত। বলুন, ‘এটা আল্লাহ অনুগ্রহে ও তাঁর দয়ায়; কাজেই এতে তারা যেন আনন্দিত হয়।’ তারা যা পুঞ্জীভূত করে তার চেয়ে এটা উত্তম।”^১

তিনি আরও বলেন,

وَمَا أَنْزَلْنَا عَلَيْكَ الْكِتَابَ إِلَّا لِتُبَيِّنَ لَهُمُ الَّذِي اخْتَلَفُوا فِيهِ وَهُدًى
وَرَحْمَةً لِّقَوْمٍ يُؤْمِنُونَ.

“আর আমি তো তোমার প্রতি কিতাব নাযিল করেছি যারা এ বিষয়ে মতভেদ করে তাদেরকে সুস্পষ্টভাবে বুঝিয়ে দেয়ার জন্য এবং যারা ঈমান আনে এমন সম্প্রদায়ের জন্য পথনির্দেশ ও দয়াস্বরূপ।”^২

১. সূরা ইউনুস, আয়াত: ৫৭-৫৮।

২. সূরা আন-নাহল, আয়াত: ৬৪।

কিয়ামত পর্যন্ত আল-কুরআন হিফযতের দায়িত্ব আল্লাহ তা'আলা নিজেই নিয়েছেন। আল-কুরআন সংরক্ষণের বিষয়টি মূলত আল্লাহর মহান কুদরতের বিশাল নিদর্শন। যে প্রজন্মের মধ্যে কুরআন সরাসরি নাযিল হয়েছে তাদের জন্য এ গ্রন্থ যেমন উপযোগী ও চির আধুনিক ছিল, তাদের পরবর্তী আগত অনাগত সকল প্রজন্মের জন্যও তা চিরন্তন ও শাস্বত জীবনাদর্শ। অতএব, সন্দেহ নেই যে, আল-কুরআনের শেখন ও শিক্ষাদান, নিয়মিত অধ্যয়নের মাধ্যমে একে সঠিকভাবে বুঝা, উপলব্ধি করা ও যথাযথ গুরুত্বের সাথে সে অনুযায়ী আমল করা সেসব লোকদেরই অনুসৃত নীতি যারা সর্বযুগেই ছিলেন সৎ ও পুণ্যবান। বরং এ হচ্ছে সেই ঠিকানা যেখানে দুনিয়া ও আখেরাতের যাবতীয় কল্যাণ ও সফলতা নিহিত।

সর্বযুগেই মুসলিম জনসাধারণ কুরআনের প্রতি সর্বাধিক গুরুত্ব প্রদান করেছে। মহান আল্লাহ ততদিন পর্যন্ত মুসলিম উম্মাহকে সর্বোত্তম ও শ্রেষ্ঠ জাতির স্বীকৃতি দিবেন যতদিন তারা এ গ্রন্থটি অধ্যয়ন করবে, হিফয করবে, হিফযত করবে, এর অর্থ নিয়ে চিন্তা-গবেষণা করবে, এর গূঢ় তত্ত্ব উপলব্ধি করবে, এর নির্দেশ মেনে চলবে এবং এর নিষেধকৃত সকল কিছু পরিহার করবে। ধর্ম, বর্ণ ও গোত্র নির্বিশেষে সকল জাতির জীবনে এ গ্রন্থের প্রয়োজনীয়তা যেহেতু অপরিসীম, সেহেতু মুসলিমগণ এ গ্রন্থের প্রতি সর্বাধিক যত্ন ও গুরুত্ব দিয়েছে, পৃথিবীর ইতিহাসে আর কোনো জাতির গ্রন্থ এ রকম গুরুত্ব পাওয়ার সৌভাগ্য লাভ করেনি। কুরআন কারীমের এ অপরিসীম গুরুত্বের কারণে সারা বিশ্বের মুসলিম মানসে কুরআনের পঠন-পাঠন, অধ্যয়ন ও কুরআন বুঝার এক অভূতপূর্ব সাড়া ও বিপুল উদ্দীপনা সৃষ্টি হয়েছে, যেন কুরআনে কারীমের এ বিশাল চর্চা থেকে জীবনের প্রতিটি ক্ষেত্রেই নিষ্ঠাবান মুসলিম মাত্রই উপকৃত হতে পারে। কিন্তু প্রশ্ন থেকে যায় যে, কীভাবে আমরা কুরআনের সঠিক বুঝা ও উপলব্ধি অর্জন করব? এ প্রবন্ধে আমরা সে প্রশ্নটির সঠিক উত্তর পাওয়ারই চেষ্টা করব এবং পাশাপাশি এমন কিছু বিষয় উপস্থাপন করব যা পাঠকের মন ও মানস থেকে অবোধগম্যতার সকল দেয়াল তুলে দিবে এবং কুরআনকে সঠিকভাবে বুঝে নিতে সহায়তা করবে।

আমাদের কেন কুরআন বুঝতে হবে?

কুরআন বুঝার পন্থা সম্পর্কে আলোকপাত করার আগে আমাদের বুঝতে হবে কুরআন বুঝার কেন এতো গুরুত্ব। সেটিই নিচে তুলে ধরা হলো:

১. কুরআন হচ্ছে দীনের সকল জ্ঞানের উৎস এবং মৌলভিত্তির আধার। দীন, দুনিয়া ও আখেরাতের সকল কল্যাণ এর মাধ্যমেই শুধু অর্জিত হয়। কুরআন নাযিল হয়েছে এর বিধান অনুযায়ী আমল করার জন্য। আমলের জন্য বুঝা ও উপলব্ধির প্রয়োজন। না বুঝে আমল করা মানুষের পক্ষে সম্ভব নয়। যে ব্যক্তি কুরআন পড়ে অথচ বুঝে না তার উদাহরণ হলো- যেমন একদল লোকের কাছে তাদের উর্ধ্বতন কর্তৃপক্ষের কাছ থেকে একটি নির্দেশিকা আসল, যাতে লিখা আছে কী করা যাবে আর কী করা যাবে না, কিসে তাদের কল্যাণ হবে এবং কীভাবে ভুলপথে চললে শত্রু তাদেরকে পাকড়াও করবে, তারা সে নির্দেশিকা মাথায় রেখে খুবই সম্মান দেখাল এবং সুন্দর সুরে তা পড়ল কিন্তু বুঝার চেষ্টা না করে ভুল পথে চলল, ফলে অনিবার্যরূপেই তারা শত্রু দ্বারা আক্রান্ত হলো।
২. কুরআনের অর্থ না বুঝার মানেই হলো দীনের সঠিক জ্ঞান ও ধারণা না থাকা। আবুদ্বারদা রাদিয়াল্লাহু আনহু বলেন,

كُنَّا مَعَ رَسُولِ اللَّهِ صَلَّى اللَّهُ عَلَيْهِ وَسَلَّمَ فَشَخَّصَ بِبَصْمِهِ إِلَى السَّبَاءِ ثُمَّ قَالَ: «هَذَا أَوَانُ يُحْتَلَسُ الْعِلْمُ مِنَ النَّاسِ حَتَّى لَا يَقْدِرُوا مِنْهُ عَلَى شَيْءٍ» فَقَالَ زِيَادُ بْنُ لَبِيدٍ الْأَنْصَارِيُّ: كَيْفَ يُحْتَلَسُ مِنَّا وَقَدْ قَرَأْنَا الْقُرْآنَ فَوَاللَّهِ لَنَنْقُرَنَّهُ وَكَنُقِرَّئِنَّهُ نِسَاءَنَا وَأَبْنَاءَنَا، فَقَالَ: «ثَكَلْتُكَ أُمَّكَ يَا زِيَادُ، إِنْ كُنْتُ

لَأَعُدَّكَ مِنْ فَقَهَاءِ أَهْلِ الْبَدِينَةِ هَذِهِ التَّوْرَةُ وَالْإِنْجِيلُ عِنْدَ
 الْيَهُودِ وَالنَّصَارَى فَبَإِذَا تَغْنَى عَنْهُمْ؟» قَالَ جُبَيْرٌ: فَلَقِيتُ
 عَبَادَةَ بَنِ الصَّامِتِ، قُلْتُ: أَلَا تَسْمَعُ إِلَيَّ مَا يَقُولُ أَخُوكَ أَبُو
 الدَّرْدَاءِ؟ فَأَخْبَرْتَهُ بِأَلَّذِي قَالَ أَبُو الدَّرْدَاءِ قَالَ: «صَدَقَ أَبُو
 الدَّرْدَاءِ، إِنَّ شَيْئًا لَأُحَدِّثُكَ بِأَوَّلِ عِلْمٍ يُرْفَعُ مِنَ النَّاسِ؟
 الْخُشُوعُ، يُوشِكُ أَنْ تَدْخُلَ مَسْجِدَ جَبَاعَةَ فَلَا تَرَى فِيهِ رَجُلًا
 خَاشِعًا».

আমরা রাসূলুল্লাহ সাল্লাল্লাহু আলাইহি ওয়াসাল্লামের সাথে ছিলাম, তিনি আকাশের দিকে দৃষ্টি নিষ্ক্ষেপ করে বললেন, “এটা সে সময় যখন মানুষের কাছ থেকে জ্ঞান উঠিয়ে নেয়া হবে, ফলে তারা তা অর্জন করতে সক্ষম হবে না।” তখন যিয়াদ ইবন লাবিদ আল-আনসারী বললেন, কীভাবে জ্ঞান আমাদের কাছ থেকে ছিনিয়ে নেয়া হবে অথচ আমরা কুরআন পড়েছি? আল্লাহর কসম! আমরা অবশ্যই কুরআন পড়ব, আর আমাদের স্ত্রী ও সন্তানদেরকে কুরআন পড়াব। রাসূলুল্লাহ সাল্লাল্লাহু আলাইহি ওয়াসাল্লাম বললেন, “হে যিয়াদ তোমার মা তোমাকে হারিয়ে ফেলুক (তোমার মৃত্যু হোক)”^৩, আমি তো তোমাকে মদীনাবাসী ফকীহদের মধ্যে গণ্য করতাম। এ তাওরাত এবং ইঞ্জিল ইয়াহূদ ও নাসারাদের কাছে আছে। কিন্তু তা তাদের কি কাজে এসেছে?” জুবায়ের বললেন, এরপর আমরা উবাদাহ ইবনুস সামিতের সঙ্গে সাক্ষাৎ করলাম। আমি বললাম, তুমি কি শুনেছ তোমার ভাই আবুদ্দারদা কী বলছে? আর আবুদ্দারদা কী বলেছে তা তাকে অবহিত

৩. এটা কোনো বদ-দোআ নয়; বরং আরবি বাকরীতি। অপছন্দনীয় কিংবা সঠিক নয় এমন কথা বলা হলে আরবগণ এ বাক্য কিংবা ওয়াইলাক (তোমার ধ্বংস) ব্যবহার করে থাকে।

করলাম। তিনি বললেন, আবুদ্বারদা সত্য বলেছে, তুমি চাইলে আমি তোমার কাছে সে ইলম সম্পর্কে বলব যা সর্বপ্রথম উঠিয়ে নেয়া হবে, তা হলো খুশু ও বিনয়। তুমি হয়ত কোনো মসজিদে প্রবেশ করে সেখানে কোনো বিনয়ী লোক পাবে না।”^৪

অতএব বুঝা গেল যে, ইলম ও জ্ঞান উঠে যাওয়ার কারণই হলো এমন ব্যক্তিগণের অভাব ও অনুপস্থিতি যারা ইলমকে ধারণ করবেন এবং সঠিকভাবে উপলব্ধি করবেন ও আমল করবেন।

৩. কুরআন বুঝা ও কুরআন নিয়ে চিন্তা-গবেষণার বিপুল সাওয়াব রয়েছে। উকবা ইবন আমের আল-জুহানী বলেন,

خَرَجَ رَسُولُ اللَّهِ صَلَّى اللَّهُ عَلَيْهِ وَسَلَّمَ وَنَحْنُ فِي الصُّفَّةِ، فَقَالَ: «أَيُّكُمْ يُحِبُّ أَنْ يَغْدُوَ كُلَّ يَوْمٍ إِلَى بَطْحَانَ، أَوْ إِلَى الْعَقِيقِ، فَيَأْتِي مِنْهُ بِنَاقَتَيْنِ كَوْمَاوَيْنِ فِي غَيْرِ إِثْمٍ، وَلَا قَطْعِ رَحِمٍ؟»، فَقُلْنَا: يَا رَسُولَ اللَّهِ نَحِبُّ ذَلِكَ، قَالَ: «أَفَلَا يَغْدُو أَحَدُكُمْ إِلَى الْمَسْجِدِ فَيَعْلَمُ، أَوْ يَفْرَأُ آيَتَيْنِ مِنْ كِتَابِ اللَّهِ عَزَّ وَجَلَّ، خَيْرٌ لَهُ مِنْ نَاقَتَيْنِ، وَثَلَاثَ خَيْرٌ لَهُ مِنْ ثَلَاثِ، وَأَرْبَعٌ خَيْرٌ لَهُ مِنْ أَرْبَعٍ، وَمِنْ أَعْدَادِهِنَّ مِنَ الْإِبِلِ»

“আমরা আহলে সুফফার সাথে থাকাবস্থায় রাসূলুল্লাহ সাল্লাল্লাহু ‘আলাইহি ওয়াসাল্লাম একবার আমাদের কাছে এসে বললেন, “তোমাদের কোন ব্যক্তির এটা পছন্দ যে, সে আল্লাহর অবাধ্যতা ছাড়াই এবং আত্মীয়তার সম্পর্ক নষ্ট না করে বুতহান অথবা আকীক

৪. সুনানে তিরমিযী, কিতাবুল ইলম, অনুচ্ছেদ: ইলম উঠে যাওয়া প্রসঙ্গে, হাদীস নং ২৬৫৩। ইমাম তিরমিযী বলেন, হাদীসটি হাসান গরীব। আলবানী বলেন, সহীহ।

প্রান্তরে (মদীনার দুটো উপত্যক) গিয়ে দু'টো বিশালকায় উট নিয়ে আসবে?" আমরা বললাম, আমাদের সবারই তা পছন্দ। তিনি বললেন, তোমাদের কেউ প্রতিদিন মসজিদে গিয়ে কিতাবুল্লাহ'র দু'টো আয়াত শেখা কিংবা পড়া দু'উটের চেয়েও তার জন্য উত্তম। আর তিনটি আয়াত তিনটি উটের চেয়ে এবং চারটি আয়াত চারটি উটের চেয়ে উত্তম। আর যতগুলো আয়াত সে অধ্যয়ন করবে তা সমসংখ্যক উটের চেয়ে উত্তম।”^৫ যদি জ্ঞানার্জন সবচেয়ে উত্তম ও মর্যাদাকর কাজ হয়ে থাকে তাহলে এর অগ্রভাগে সর্বোচ্চ পর্যায়ে রয়েছে আল্লাহর কালাম জানা, বুঝা ও উপলব্ধি করা। কেননা জ্ঞানের মর্যাদা জ্ঞানগত বিষয়ের মর্যাদার ওপর নির্ভর করে। কিতাবুল্লাহ হ'ছে জগতের সবচেয়ে সম্মানিত বিষয়; সুতরাং এর জ্ঞানার্জনই হলো সবচেয়ে সম্মানিত ও মর্যাদাকর কাজ।

৪. মুসলিমদের অনৈক্য, ভুল বুঝাবুঝি ও হানাহানি দূর করে ভালোবাসা, সম্প্রীতি ও হৃদয়তা আনয়নের বিশুদ্ধ উপকরণই হলো আল-কুরআনকে সঠিকভাবে বুঝা ও হৃদয়ঙ্গম করা। কুরআনকে সঠিকভাবে না বুঝাই হলো যত অনৈক্যের মূল। ইবরাহীম আত-তাইমী বলেন, ‘উমার রাদ্বিয়াল্লাহু ‘আনহু একদিন একাকী ছিলেন, তিনি স্বগতোক্তি করে বললেন, কীভাবে এ উম্মতের মধ্যে বিভেদ থাকতে পারে, অথচ তাদের নবী এক এবং কিবলা এক!?’ এরপর তিনি ইবন ‘আব্বাস রাদ্বিয়াল্লাহু ‘আনহুকে ডেকে পাঠালেন ও জিজ্ঞাসা করলেন, এ উম্মত কীভাবে বিভক্ত হতে পারে অথচ তাদের নবী এক ও কিবলা এক? ইবন ‘আব্বাস বললেন, হে আমীরুল মুমিনীন, আমাদের ওপর কুরআন নাযিল হয়েছে এবং আমরা তা অধ্যয়ন করেছি এবং জেনেছি কোন ব্যাপারে নাযিল হয়েছে। আর আমাদের পর একদল লোক আসবে যারা কুরআন

৫. সহীহ মুসলিম অধ্যায়: মুসাফিরদের সালাত ও এর কসর, অনুচ্ছেদ: কুরআন শেখা ও সালাতের মধ্যে কুরআন অধ্যয়নের ফযীলত, হাদীস নং ৮০৩।

পড়বে অথচ জানবে না কোন ব্যাপারে কুরআন নাযিল হয়েছে। ফলে সে ব্যাপারে তারা নিজস্ব মতামত দিবে। আর যখন তাদের নিজস্ব মতামত হবে তারা মতভেদ করবে এবং এভাবে মতভেদ করতে করতেই তারা সংঘর্ষে লিপ্ত হবে...।”^৬

৫. কুরআন শেখা ও তা সঠিকভাবে বুঝা থেকে যারা বিরত থাকে ও মুখ ফিরিয়ে রাখে তারা মূলত কুরআনী জীবন-যাপন থেকে সরে গিয়ে অন্য জীবনে অভ্যস্ত হয়ে পড়ে। আল্লাহ মহাগ্রন্থ আল-কুরআনের মাধ্যমে জানিয়েছেন, যাদের কাছে কুরআনের জ্ঞান এসেছে অথচ সে জ্ঞান থেকে তারা মুখ ফিরিয়ে নিয়েছে ও তা পরিত্যাগ করেছে, তাদেরকে তিনি জ্ঞানের আলোতে উদ্ভাসিত করেননি, বরং অজ্ঞানতার মধ্যেই তারা হাবুডুবু খেয়েছে। তিনি ইয়াহুদীদের সম্পর্কে বলেন,

وَلَمَّا جَاءَهُمْ رَسُولٌ مِّنْ عِنْدِ اللَّهِ مُصَدِّقٌ لِّمَا مَعَهُمْ نَبَذَ فَرِيقٌ مِّنَ الَّذِينَ أُوتُوا الْكِتَابَ ۖ كَتَبَ اللَّهُ وَرَاءَ ظُهُورِهِمْ كَانَّهُمْ لَا يَعْلَمُونَ ۚ وَاتَّبَعُوا مَا تَتْلُوا الشَّيَاطِينُ عَلَىٰ مُلْكٍ سَلِيمٍ ۚ

“আর যখন তাদের নিকট আল্লাহর পক্ষ থেকে একজন রাসূল আসলেন, তাদের কাছে যা রয়েছে তার সত্যায়নকারী হিসেবে, তখন যাদেরকে কিতাব দেয়া হয়েছিল তাদের একদল আল্লাহর কিতাবকে পিছনে ছুঁড়ে ফেলল, যেন তারা জানেই না। আর সুলাইমানের রাজত্বে শয়তানরা যা আবৃত্তি করত তারা তা অনুসরণ করেছে।”^৭

ইয়াহুদীদের কাছে আল্লাহর পক্ষ থেকে কিতাব আসার পর তারা তা থেকে মুখ ফিরিয়ে নিয়েছিল বলে আল্লাহ তাদেরকে এমন এক নিকৃষ্ট

৬. ইবরাহীম ইবন মুসা ইবন মুহাম্মাদ আশ-শাতিবী, আল-মুয়াফাকাত ফী উসুলিল ফিকহ, তাহকীক: মাশহুর হাসান সালমান, দার আফফান, ১৯৯৭, ৪/২০০।

৭. সূরা আল-বাকারাহ, আয়াত: ১০১-১০২।

গ্রন্থের ফিতনায় তাদেরকে আক্রান্ত করেছিলেন যা সুলাইমান
‘আলাইহিস সালামের রাজত্বে শয়তান তিলাওয়াত করতো।”^৮

আল্লাহ কুরআন থেকে মুখ ফিরিয়ে রাখার শাস্তি সম্পর্কে বলেন,

وَمَنْ أَعْرَضَ عَنْ ذِكْرِي فَإِنَّ لَهُ مَعِيشَةً ضَنْكًا وَنَحْشُرُهُ يَوْمَ الْقِيَامَةِ
أَعْمَى.

“আর যে আমার স্মরণ থেকে মুখ ফিরিয়ে নিবে, তার জন্য হবে নিশ্চয়
এক সংকুচিত জীবন এবং আমি তাকে কিয়ামত দিবসে উঠাব অন্ধ
অবস্থায়।”^৯

তিনি আরও বলেন,

وَمَنْ أَظْلَمُ مِمَّنْ ذُكِّرَ بِآيَاتِ رَبِّهِ ثُمَّ أَعْرَضَ عَنْهَا إِنَّا مِنَ الْجَائِمِينَ
مُنتَقِبُونَ.

“আর তার চেয়ে বড় যালিম আর কে, যাকে স্বীয় রবের আয়াতসমূহের
মাধ্যমে উপদেশ দেয়ার পর তা থেকে মুখ ফিরিয়ে নেয়? নিশ্চয় আমি
অপরাধীদের কাছ থেকে প্রতিশোধ গ্রহণকারী।”^{১০}

৮. আবদুর রহমান ইবন সাদী, আল-কাওয়ায়েদ আল-হিসান, ৩৪ নং ধারা।

৯. সূরা ত্বা-হা, আয়াত : ১২৪।

১০. সূরা আস-সাজদাহ, আয়াত: ২২।

কুরআন বুঝা সহজ

কুরআনের পঠন-পাঠন, তিলাওয়াত ও অধ্যয়ন এবং কুরআনের অনুশাসন মেনে চলাকে আল্লাহ তাঁর বান্দাদের জন্য সহজ করে দিয়েছেন বলে সূরা আল-কামারে মোট চারবার ঘোষণা দিয়েছেন।

وَلَقَدْ يَسَّرْنَا الْقُرْآنَ لِلذِّكْرِ فَهَلْ مِنْ مُدَكِّرٍ.

“আর নিশ্চয় আমি কুরআনকে সহজ করে দিয়েছি উপদেশ গ্রহণের জন্য, অতএব কোনো উপদেশ গ্রহণকারী আছে কি?”^{১১}

আল-কুরআনের শব্দমালা সহজেই তিলাওয়াত ও হিফয করা যায়, এর অর্থ সহজেই বোধগম্য হয় এবং শেখা যায়; কেননা তা বাক্য বিন্যাসের দিক থেকে সবচেয়ে সাবলীল ও সুন্দর, শৈল্পিকতায় সবচেয়ে নিপুণ ও শ্রেষ্ঠ, অর্থের দিক থেকে সবচেয়ে সত্যবাদী, ব্যাখ্যা ও বিশ্লেষণে সবচেয়ে স্পষ্ট। যে বা যারাই কুরআনের জ্ঞান অর্জনের উদ্দেশ্যে অগ্রসর হয় আল্লাহ তাদের জন্য তা নিতান্তই সহজ করে দেন। পৃথিবীর বড় বড় অমুসলিম বিজ্ঞানী যারা আরবী ভাষা শিখেনি তাদের অনেকেই শুধু কুরআনের তরজমা পড়েই আল্লাহর Message পেয়ে যায় এবং সেজন্যই পাশ্চাত্যের অনেক বড় পণ্ডিত হয়েও তারা ইসলাম গ্রহণ করতে দ্বিধা করে না। আল্লাহ তা’আলা আরও বলেন,

فَأَنبَأَ يَسَّرْنَاهُ بِلِسَانِكَ لَعَلَّهُمْ يَتَذَكَّرُونَ.

“অতঃপর আমি তো তোমার ভাষায় কুরআনকে সহজ করে দিয়েছি, যাতে তারা উপদেশ গ্রহণ করে।”^{১২}

فَأَنبَأَ يَسَّرْنَاهُ بِلِسَانِكَ لِتُبَشِّرَ بِهِ الْمُتَّقِينَ وَتُنذِرَ بِهِ قَوْمًا لُدًّا.

১১. সূরা আল-কামার, আয়াত: ১৭, ২২, ৩২, ৪০।

১২. সূরা আদ-দুখান, আয়াত: ৫৮।

কুরআন বুঝা এবং কুরআন নিয়ে গবেষণা কি শুধু আলেমগণেরই কাজ?

ইসলাম কুরআন বুঝা এবং কুরআন নিয়ে চিন্তা-গবেষণা করা শুধু আলেমদের মধ্যেই সীমাবদ্ধ রাখেনি। বরং প্রত্যেক মুসলিমের অবশ্য কর্তব্য হচ্ছে ঐ পরিমাণ কুরআন চর্চা করা, যতটুকু সাধ্য আল্লাহ তাকে দিয়েছেন এবং যতটুকু জ্ঞান, বুদ্ধি ও বুঝ তার রয়েছে। আল্লাহ তাঁর বান্দাদের সকলকেই কুরআন বুঝা ও তা নিয়ে চিন্তা-গবেষণা করার প্রতি আহ্বান করেছেন। কোনো নির্দিষ্ট শ্রেণিকে তিনি বিশেষভাবে এ দায়িত্ব দেননি। কুরআন বুঝা ও গবেষণা যদি কোনো একদল লোকের মধ্যেই সীমাবদ্ধ করা হতো তাহলে কুরআনের কল্যাণ সীমিত হয়ে যেত এবং আয়াতের আহ্বান স্পষ্টভাবে শুধু তাদের ব্যাপারেই ব্যক্ত করা হতো, কিন্তু কুরআনের আহ্বান এমনটি নয় -এটা উম্মাহ'র সকলেরই জানা।

ইবন 'আব্বাস রাঃদিয়াল্লাহু 'আনহুমা বলেন, কুরআনের তাফসীর চারভাগে বিভক্ত;

প্রথম প্রকার: আরবরা তাদের নিজেদের কথা থেকেই জানে।

দ্বিতীয় প্রকার: তাফসীর না বুঝার ওজর কারো পক্ষ থেকেই গ্রহণযোগ্য নয়।

তৃতীয় প্রকার: তাফসীর অনুধাবন শুধু আলেমগণের পক্ষেই সম্ভব।

আর চতুর্থ প্রকার: আল্লাহ ছাড়া আর কেই জানেন না।”^{১৪}

তন্মধ্যে যে তাফসীর না বুঝার ক্ষেত্রে কারো ওজর শরী‘আতে গ্রহণযোগ্য নয় তা হলো কুরআনে যেসব আহকাম ও বিধান স্পষ্ট, হৃদয়কে নাড়া দেয়া সুন্দর উপদেশাবলি, শক্তিশালী ও সুস্পষ্ট দলীল ও প্রমাণসমূহ এবং সেসব সাধারণ বক্তব্য যা আয়াত থেকে স্পষ্টভাবে বুঝা যায়।

১৪. ইমাম ইবন জারীর, তাফসীর ইবন জারীর (১/৫৭)।